

佛說四輩經一名四輩學經

西晉三藏法師竺法護譯

聞如是一時佛在舍衛國祇樹給孤獨園爾時諸四輩弟子天帝龍鬼神質諒神皆詣祇樹稽首佛足却就常位坐佛告諸弟子吾今所出法經所可教戒皆自各守其意念末世毒然之時四輩弟子若出家若居家修道皆狂醉衆色不復承用佛經法專愚自用便使吾道薄淡令世人謗訕吾道信是弟子傲慢所致鶩鷯子正衣服又手一心聽佛說四輩經如是佛言若末世男子能出家除剃頭髮爲道者第一去離愛欲志存大乘常當慈悲喜護爲主去想行普念一切蜎飛蠕動之類視之如身無異不得妄起恚怒深入明度常以明度權便誘致朦冥使入無極以戒德除

心穢病不得爲世間之業能行此者便可出家名曰道士不可依恃吾法自以出家爲信不專念道或能有下賤之人倚道自活無益一切而但出意說爲人師主輕薄戲調不自檢察使尊法薄淡世人不信非吾出家弟子之法也佛言若有女人出家除髮爲道以去愛欲當專精靜處不得與出家男子同廟止若行師受當有等類不得獨往稟受常當晚出早還不得妄出廟宿止但得教授女人不得教授男子所著衣服不得刻繒帛綠色苾芬不得輕言戲語不得貪財寶物戒行清淨名曰出家道人若輕言戲謔未語預笑心志不定意行穢濁惡口罵詈輕言不節不能靜處惰慢自大不自檢勑者雖復出家故是賤人非出家弟子也佛言若有男子心志繫道

卷十

五

不能出家者在於愛欲之中當受持五戒月
六齋第一孝順父母治家養子朝暮燒香然
燈稽首三尊悔過十方恭敬四輩不得慢經
自大去離慳貪常以至誠不得欺殆世人不
得與世間人妻婦坐起同席住行相隨同室
異牀除去四事以四等心普視一切老者若
父若母少者若弟若子恒以明度法藥洗除
衆病不得妄瞋恚罵詈常以無極方便誘解
世人使入大乘不得爲新學者說深經奧妙
之義當爲除想識無量礙者不得綺飾衣服
不得與世間妻女戲謔言語往來報答以致
因緣如是者爲清淨道人若行不清淨貪利
財色或於世俗綺飾衣服互相翹舉但結非
惡恥暎所欲輕言戲謔未語預笑託已同法
口說妙言外似清虛內懷貪惑心存財帛以

自供給活於妻子慢佛尊經不復修學反習
外道之術世藥解奏符呪厭說療治衆病因
緣外道解奏之術或於財帛絢束上下賊意
欲得因解奏之術不持吾法當來者却皆由
斯輩是故非吾法學弟子也佛言若有女人
不能出家在於愛欲之中心樂道者當持五
戒月六齋孝順父母姑嫜叔妹夫婿不得過
罵兒子婢使不得輕行來宿止他家不得與
世間男子語言調弄戲笑不得妄瞋恚罵詈
惡口不得證說他人惡不得陷人兒子妻妾
奴婢過惡恒當專精念道爲上首不得與世
間凡人說法顏貌不得與人男子相對不得
教他人男子不得說世間吉凶善惡災變之
相不得嬌慢自大晝夜三時燒香稽首三尊
悔過十方稟受經行言數自勸不得希望供

養貪利財帛不得嫉妬夫主當自賤女人身
願爲男子轉身受福可得上天宮觀自然是
清信女人學道之法若不孝順憍慢姑嫜嫉
妬夫主撻罵奴婢造惡自是怨恨恚怒毒意
向人行者如是是爲非法學女人弟子也佛
告諸弟子清慎汝心守護身口恒以四等濟
於衆生以道寶之慧恩施一切如佛教誠必
得度世弟子諸來會者聞佛說經歡喜奉行
作禮而去

佛說四輩經